



JUDICIAL *SYSTEM* MONITORING PROGRAMME
PROGRAMA MONITORIZASAUN BA *SISTEMA* JUDISIÁRIU

Sumáriu Kazu
Tribunál Distritál Suai
Mai 2021

Afirmasaun: Sumáriu Kazu ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza :19

Artigu	Tipu Kazu	Númeru
Artigu 145 Kódigu Penál KP, no artigu 2,3, 35 Lei Kontra Violénsia Doméstika (LKVD)	Krime ofensa ba integridade física simples ho natureza violénsia doméstika artigu 2 kona-ba konseitu violénsia doméstika no artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku	6
Artigu 178 KP	Aktu seksuál ho adolexente	1
Artigu 177 KP	Abuzu seksuál ba menór	1
Artigu 1757, 1758, 1759, 1762, 1765, 1786, 1782, 1804, 1805 KS	kazu ezersisiu poder paternál	1
Artigu 171 KP	Koasaun seksuál	1
Artigu 171 KP & Artigu 145 KP ho Artigu 2,3,35 no 36 LKVD	Koasaun seksuál no ofensa ba integridade física simples ho natureza violénsia doméstika	1
Artigu 172 KP	Violasaun seksuál	1
Artigu 23 KP, 138 KP, Lei artigu 2 nú 1 (f) no artigu 20 husi lei Nú 5/2017	Tentativa omisídiu simples no arma brankas	2
Artigu 138 KP	Omisídiu simples	1

Artigu 145 Kódigu Penál KP, no artigu 2,3, 35 LKVD no Artigu 157 KP	Ofensa ba integridade física simples ho natureza violénsia doméstika no krime ameasa	1
Artigu 316 KP	Kontra bandu	1
Artigu 316 KP no artigu 271 KP	Kontra bandu no reseptasaun simples	1
Artigu 252	Furtu agravadu	1
Total		19

2. Total desizaun ne'ebé JSMP monitoriza: 14

Tipu pena	Artigu	Númeru
Suspensaun ba prizaun nia ezekusaun	Artigu 68 KP	8
Pena multa	Artigu 67 KP	1
Omologa		1
Absolve		2
Pena multa no absolve	Artigu 67 KP	1
Pena prizaun	Artigu 66 KP	2
Total		14

3. Total kazu sira ne'ebé adia tuir JSMP nia monitorizasaun:0

4. Total kazu sira ne'ebé sei kontinua tuir JSMP nia monitorizasaun : 5

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade física simples ho natureza violénsia doméstika

Nú. Prosesu : 0015/21. CVSUIA
 Kompozisaun Tribunál : Singulár
 Juis : Dr. Eusébio Xavier Victor
 Prokuradór : Dr. Rafael Jeronimo Gusmão
 Defeza : Dr. Eskolastico Amaral
 Desizaun : Pena multa US\$45.00

Iha 06 Maiu 2021, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VdA hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 04 Janeiro 2020, iha oras tuku 9:00, arguidu basa dala ida iha lezada nia tilun-hun parte loos, buti maka'as iha lezada nia kakorok no rasta lezada

tama ba uma laran no kontinua tuku dala ida iha lezada nia ulun sorin parte karuk, aktu sira ne'e rezulta mean no moras. Antes agresaun ne'e, arguidu ho lezada diskute malu kona-ba, bainhira arguidu ho lezada atu ba Likisa no arguidu dehan ba lezada atu sira sae motor de'it, maibe lezada lakohi no hakarak atu sae bis de'it. Ho nune'e mosu agresaun hirak ne'e.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penal to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu konfesa totalmente ba faktu sira iha akuzasaun no deklarasaun mós katak foin primeiravés mai hatan iha tribunál, arrepende ninia hahalok no promete sei la repete hahalok hanesan iha futuro. Arguidu deklarasaun liután katak depoisde akontesimentu ne'e, iha kalan ne'e keda arguidu husu keda deskulpa ba lezada.

Alende ne'e, lezada mós kontinua konfirma faktu sira iha akuzasaun no reforsa mós arguidu nia deklarasaun katak arguidu foin primeravéz baku lezada no depoisde akontesimentu ne'e sira di'ak malu keda.

Alegasaun finál

Prokurador, haktuir katak arguidu provadu baku duni lezada bazeia ba konfisaun arguidu nian no konfirma mós husi lezada no arguidu ninia hahalok ne'e priense elementus sira iha artigu 145 KP, tanba ne'e husu ba tribunál atu kondena arguidu ho pena prizaun fulan neen no suspende ba tinan ida.

Entretantu, defeza husu ba tribunál atu kondena arguidu ho pena ne'ebé adekua ho konsiderasaun sira hanesan arguidu konfesa, arrepende nia hahalok, di'ak malu ona ho lezada, foin primeiravés mai hatan iha tribunál no promete sei la repete krime hanesan iha futuro.

Desizaun

Depois avalia faktu sira hotu, tribunál prova katak arguidu basa dala ida iha lezada nia tilun-hun parte loos, buti maka'as iha lezada nia kakorok no rasta lezada tama ba uma laran no kontinua tuku dala ida iha lezada nia ulun sorin parte karuk.

Bazeia ba faktu provadu sira ne'e tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál no di'ak malu ona ho lezada no promete sei la komete tan krime hanesan iha futuro. Ho nune'e tribunál konklui prosesu ne'e no kondena arguidu ho pena multa US\$45.00, ne'ebé arguidu sei selu US\$0,50 kada loraun durante loraun 90. Tribunál mós fiksa pena

alternativa loraun 40 prizaun, bainhira arguidu la selu pena multa refere no selu mós kustu judisiál US\$10.00.

2. Kazu sivíl regulasaun ba ezersísiu podér paternál

Nú. Prosesu : 0042/19 CVTDS
Kompozisaun Tribunál : Singulár
Juis : Dr. Jose Maria Araújo
Prokuradór : Dr. Napoleão Soares da Silva
Defeza : Dr. Domingos dos Santos
Desizaun : Omologa dezisténsia keixa

Iha 06 Maiu 2020, Tribunál Distritál Suai hala'o julgamentu ba kazu sivíl kona-ba regulasaun ezersísiu podér paternál ho forma espesial ne'ebé envolve menór na'in rua, LJG no AG, hasoru rekeridu OCM no rekerida JM, akontese iha Munisípiu Covalima.

Termu no fundamentu sira

Rekerida no rekeridu moris hamutuk hanesan feen la'en, iha tinan 2019 iha oras tuku 7:00 menór nain rua hatama asaun petisaun ida ne'e husu ba rekeridu atu fó alimentasaun ba menór nain rua ne'ebé rekeridu durante ne'e abandona no la fó alimentasaun ba menór nain rua. Rekeridu moris separadu ona ho rekerida desde 2019, to'o agora nunka tau matan ba sira nia oan.

Kazu ne'e relasiona ho ezersísiu podér paternál tuir artigu 757, 758(1), 759, 762,1765, 1786, 1787(2), 1782, 1804 no 1805 KS

Termu no fundamentu sira

Rekerida no rekeridu moris hamutuk desde tinan 2012 no sira iha oan na'in rua AF no NH. Maibé iha tinan 2015, rekeridu sai husi uma no abandona menór na'in rua inklui rekerida hodi ba moris hamutuk fali ho feto seluk. Rekeridu abandona nia obrigasaun nu'udar aman ba menór sira no nunka fó ona alimentasaun ba ménor sira husi tempu ne'ebá. Ho nune'e rekerida apresenta pedidu ba Ministériu Públiku hodi husu podér paternál ba ménor

Tentativa konsiliaun

Tentativa konsiliaun ne'e rekeridu no rikerida konkorda menór nain rua ne'e nafatin hela ho rekerida, kona-ba visita agora dadaun menór nain rua seidak eskola nune'e rekeridu bele ba lori menór nain rua ne'e ba halimar iha nia uma, menor nain rua ba oin eskola ona, rekeridu nia oras visita ne'e loraun Sesta no loraun Domingu, rekeridu mós bele ba lori menór nain rua hodi selebra rekeridu nia aniversariu no loraun bo'ot no mós rekeridu bele ba lori menór nain rua ba iha ninia uma hodi selebra loraun bo'ot sira.

Rekeridu hanesan ema agrikultor pruntu sei fó alimentasaun kada fulan ida US\$20.00 ba nia oan nain rua, rekeridu entrega osan refere direktamente ba rekerida, la inklui sosa rupa no ba saúde sira.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

3. Krime ofensa ba integridade fizika simples ho natureza violénsia doméstika

Nú. Prosesu : 0048/20. CVSUI
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. José Elo
Defeza : Dr. Domingos dos Santos
Desizaun : Pena prizaun fulan 6 suspende ba tinan 1

Iha 07 Maiu 2021, Tribunál Distritál Suai prezide julgamentu leitura sentensa ba krime ofensa ba integridade fizika símples ho natureza violénsia doméstika ne'ebé envolve arguidu OA hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 21 Juñu 2020, iha oras tuku 18.00 lokraik, arguidu tuku dala ida iha lezada nia tilu hun parte loos, tuku dala ida iha lezada nia kabaas no tebe dala ida iha lezada nia hirus matan, rezulta lezada oin nakukun no monu ba rai. Antes agresaun ne'e, arguidu ho lezada diskute malu kona-ba bainhira lezada bolu arguidu atu ba sosa modo iha merkadu, arguidu lahatan buat ida no tuur nonook de'it, nune'e mosu agresaun hira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira hotu iha akuzasaun no deklara katak depoisde akontesimentu liu oras balun arguidu husu kedan deskulpa ba lezada, alende

ne'e arguidu mós deklara katak baku feen ne'e ladi'ak, foin primeiravéz mai hatan iha tribunál, arrepende nia hahalok no depoisde akontesimentu ne'e labaku ona lezada.

Alende ne'e, lezada kontinua konfirma faktu sira iha akuzasaun no haktuir katak depoisde akontesimentu ne'e kalan arguidu husu kedan deskulpa ba lezada, lezada mós hatutan liután katak depoisde akontesimentu arguidu labaku ona lezada to'o ohin loron. Lezada deklara tan katak mezmú arguidu la baku ona lezada, maibé iha futuru mak arguidu baku tan lezada, lezada pruntu atu hato'o denuncia.

Alegasaun finál

Prokuradór, haktuir katak arguidu provadu no prosidente tuir ninia konfiksaun no konfirma husi lezada, prokuradór haree katak krime violénsia doméstika aas tebes, nune'e atu halo prevensaun jerál iha futuru labele akontese tan krime hanesan, husu ba tribunál atu kondena arguidu ho pena prizaun fulan haat suspende ba iha tinan ida.

Entretantu, defeza haktuir katak arguidu foin primeiravéz mai hatan iha tribunál, arrepende ninia hahalok katak baku feen ne'e ladi'ak no depoisde akontesimentu ne'e arguidu husu kedan deskulpa no to'o ohin loron la iha ona problema hasoru lezada, ho nune'e defeza haree katak pena justu no adekúadu mak pena multa, nune'e husu ba tribunál atu kondena arguidu ho pena multa tuir arguidu nia kapasidade ekonomia.

Desizaun

Depoisde avalia faktu sira hotu, tribunál prova katak aguidu tuku dala ida iha lezada nia tilu hun parte loos, tuku dala ida iha lezada nia kabaas no tebe dala ida iha lezada nia hirus matan, rezulta lezada oin nakukun no monu ba rai. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu foin primeiravéz mai hatan iha tribunál, arrepende ninia hahalok no di'ak malu ona ho lezada. Ho nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

4. Krime Koasaun seksuál, ofensa ba integridade fízika simples ho forma violénsia doméstika

Nú. Prosesu	: 0005/18 CVSUI
Kompozisaun Tribunál	: Koletivu
Juis	: Dr. Eusébio Xavier Victor no Dra. Patricia de Araujo F. B. M. Xavier, Dr. Samuel da Costa Pacheco
Prokuradór	: Dr. Rafael Jeronimo Gusmão
Defesa	: Dr. Albano Maia
Desizaun	: Absolve arguidu husi krime koasaun seksuál no kondena arguidu ba krime ofensa ba integridade fízika simples ho pena multa US\$60.00

Iha 07 Maiu 2021, Tribunál Distrital Suai prezide julgamentu leitura akordaun ba krime koasaun seksuál no ofensa ba integridade fizika simples ho natureza violénsia doméstika ne'ebé envolve arguidu DP hasoru lezada DdS nu'udar arguidu nia kuñada no lezadu AdS nu'udar lezada DdS nia oan mane (idade 13), iha Munisípiu Covalima.

Akuzasaun prokuradór

Prokuradór akuza katak iha 12 Jullu 2016, iha oras tuku 12:00 meiodia, arguidu sai husi servisu fila ba uma, lezada DdS hamrik hela iha odamatan sala vizita nian, bainhira arguidu tama ba uma laran, arguidu kaer lezada DdS nia orgaun seksuál hodi buti ho maka'as, nune'e lezada baku ses tiha arguidu nia liman.

Tuir mai iha 24 Setembru 2016, iha oras tuku 3:00 lokraik, lezada DdS haris hotu tama ba kuartu laran atu hatais roupa, arguidu tama tuir lezada ba kuartu laran no hatete ba lezada DdS katak "*hatais ne'e lalais oituan*" kolia tiha nune'e arguidu kontinua haruka lezada kose mina ganda pura ba arguidu nia kotuk laran no kose mós ba arguidu nia kelen.

Tuir mai iha 01 Feveireiru 2017, iha oras tuku 3:00 lokraik, arguidu basa dala ida iha lezadu AdS nia kotuk laran no basa dala ida iha lezadu nia hasan parte karuk.

Prokuradór akuza arguidu kontra artigu 171 KP kona-ba koasaun seksuál ho moldura penal tinan 2 to'o tinan 8, no artigu 145 KP kona-ba ofensa ba integridade fizika simples ho moldura penál to'o 3 ka multa no konjuga ho artigu 2 (a, b) 3 (c,d) 35 (b) no 36 LKVD.

Produsaun ba prova sira

Iha julgamentu, arguidu deklara katak faktu balun loos no balun laloos, faktu ne'ebé loos mak arguidu rekuñese baku duni lezadu AdS, tanba la respeitu arguidu, kona-ba kaer lezada nia orgaun seksuál no haruka lezada kose mina ba arguidu nia kotuk laran no kelen ne'e laloos. Arguidu mós deklara katak arrepende nia hahalok, foin primeiravéz mai hatan iha tribunál no depoisde akontesimentu ne'e lezada no lezadu ba hela iha uma ketak.

Alende ne'e, lezada DdS deklara katak iha akontesimentu ne'e arguidu fila husi serbisu atu tama ba uma laran, lezada hamrik hela iha odamatan sala vizita nian tanba ne'e arguidu dudu ses lezada mak arguidu nia liman kona lezada nia kabun. Lezada deklara mós katak kona-ba kaer lezada nia orgaun seksuál ne'e família sira mak haruka lezada inventa nune'e atu hatodan arguidu iha prosesu ne'e, lezada deklara liután katak agora dadauk lezada no lezadu hela uma ketak ona no di'ak malu ona ho arguidu. Lezada deklara katak arguidu hola lezada nia alin nune'e durante ne'e lezada ho lezadu hela

hamutuk ho arguidu, maibé depoisde akontesimentu ne'e lezada ho lezadu ba hela ketak ona. Enkuantu lezadu AdS konfirma faktu hotu iha akuzasaun.

Alegasaun finál

Prokuradór, haktuir katak bazeia ba deklarasaun arguidu nian no konfirma mós husi lezada katak faktu kona-ba koasaun seksuál ne'e la ezisté, no arguidu so deklarara deit kona-ba krime ofensa ba integridade física simples ho natureza violénsia doméstika mak eziste, tanba ne'e prokuradór husu ba tribunál atu kondena arguidu ho pena prizaun tuir artigu 145 KP.

Alende ne'e defeza mós haktuir katak arguidu deklarara de'it faktu ne'ebé nia komete no lezada mós konfirma ho arguidu ninia deklarasaun katak krime koasaun seksuál ne'e la eziste, mezmú nune'e arguidu mós deklarara katak arrepende ninia hahalok, foin primeiravéz mai hatan iha tribunál, nune'e husu ba tribunál atu kondena arguidu ho pena multa. Entretantu ba krime koasaun seksuál defeza husu ba tribunál atu absolve arguidu.

Desizaun

Depois avalia faktu sira hotu, tribunál prova katak arguidu basa dala ida iha lezadu AdS nia kotuk laran no basa dala ida iha lezadu nia hasan parte karuk. Enkuantu faktu sira kona-ba arguidu kaer lezada DdS nia orgaun seksuál hodi buti ho maka'as no haruka lezada kose mina ba arguidu nia kotuk laran no kelen la provadu.

Bazeia ba faktu provadu sira ne'e tetu mós ho sirkunstánsia atenuante sira hanesan arguidu foin primeiravéz mai hatan iha tribunál, arrepende ninia hahalok. Ho nune'e tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu kada loron US\$1.00, durante loron 60. Triunál mós fixa pena alternative durante loron 40 prizaun, bainhira arguidu la selu pena multa refere no selu mós selu kustu judisiál US\$20.00.

5. Krime ofensa ba integridade física simples ho natureza violénsia doméstika

Nú. Prosesu	: 9975/17. CVSUI
Kompozisaun Tribunál	: Singulár
Juis	: Dr. Jose Maria Araújo
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Pena prizaun fulan 6 suspende ba tinan 1

Iha 10 Maiu 2021, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AdA hasoru nia eis feen, iha Munisípiu Covalima.

Akuzasaun prokuradór

Prokuradór akuza katak iha, 25 Setembru 2017, iha oras tuku 5:00 lokraik, arguidu tuku dala ida iha lezada nia tilun parte karuk no tebe dala ida iha lezada nia kotuk laran. Antes agresaun ne'e, arguidu ho lezada diskute malu kona-ba lezada simu telefone husi númeru foun ne'ebé lezada lakuñese no lezada hatan katak la'en laiha, nune'e mosu agresaun hirak ne'e.

Prokuradór akuza arguida kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2(a), 3(c), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente ba faktu sira iha akuzasaun no deklarara mós katak iha akontesimentu ne'e ema telefone lezada maibé uza númeru foun, nune'e arguidu husu tuir lezada katak se mak telefone, maibé lezada hatan katak "*ó para sibuk,*" nune'e arguidu nervoju tuku dala ida iha lezada nia kotuk laran, arguidu deklarara liután foin primeiravéz mai hatan iha tribunál, arrepende ninia hahalok no promete sei larepete hahalok hanesan iha futuro no moris separa ona ho lezada.

Iha parte seluk, lezada konfirma faktu sira iha akuzasaun no deklarara katak depoisde akontesimentu liu loron ida lezada halai ba ninia inan aman to'o agora la fila ba uma. Lezada deklarara liután katak depoisde hela separa ho arguidu, arguidu nunka ba haree sira nia oan no nunka apoiu alimentasaun ba sira nia oan.

Alegasaun finál

Prokuradór haktuir katak arguidu konfesa parsial maibé lezada konfirma akuzasaun prokuradór nian, nune'e prokuradór konsidera arguidu ninia hahalok ne'e priense duni elementu sira husi krime ofensa ba integridade física simples, ho nune'e prokuradór husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak arguidu arrepende ninia hahalok, foin primeiravés mai hatan iha tribunál, promete sei larepete ninia hahalok iha futuro. Tanba ne'e husu ba tribunál atu kondena arguidu ho pena multa tuir arguidu nia kapasidade ekonomia.

Desizaun

Depois avalia faktu sira hotu, tribunál prova katak arguidu tuku dala ida iha lezada nia tilun parte karuk no tebe dala ida iha lezada nia kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu foin primeiravéz mai hatan iha tribunál, arrepende ninia hahalok no promete sei

larepete ninia hahalok iha futuru. Ho nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

6. Krime ofensa ba integridade fizika simples ho natureza violénsia doméstika

Nú. Prosesu : 0001/21. CVSUI
Kompozisaun Tribunál : Singulár
Juis : Dra. Patricia de Araujo F. B. M. Xavier
Prokuradór : Dr. José Elo
Defeza : Dr. Albano Maia
Desizaun : Pena prizaun fulan 3 suspende ba tinan 1

Iha 17 Maiu 2021, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu FF hasoru nia feen, iha Munisípiu Ainaro.

Akuzasaun prokuradór

Prokuradór akuza katak iha 04 Janeiru 2021, iha oras tuku 19:30 kalan, arguidu basa dala ida iha lezada nia hasan parte karuk, rezulta moras no mean. Antes agresaun ne'e, arguidu ho lezada deskuti malu kona-ba lezada fó hatene ba arguidu atu faan tiha sira ninia motorizada ho marka Revo Fit, atu taka kreditu iha banku, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2(a), 3(a), 35(b) no 36 LKVD.

Produsaun ba prova sira

Iha julgamentu arguidu konfesa integralmente ba faktu sira iha akuzasaun no deklarata katak foin primeiravéz mai hatan iha tribunál, arrepende ninia hahalok no promete sei la repete ninia hahalok ne'e iha futuru. Arguidu mós haktuir ho lezada moris separa ona.

Alende ne'e lezada kontinua konfirma faktu sira iha akuzasaun no deklarata katak moris separa ona ho arguidu no agora dadaun lezada hela iha uma mahon.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, mezmus sira separa ona maibé atu evita krime hanesan akontese tan iha futuru, nune'e husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu fó pena ne'ebé adekuaudu ba arguidu ho konsiderasaun sira katak arguidu konfesa, arrepende nia hahalok, foin primeiravéz mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte karuk, rezulta moras no mean.

Bazeia ba faktu provadu ne'e tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravéz mai hatan iha tribunál no promete sei la repete tan hahalok hanesan iha futuru, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida no selu mós kustu judisiál US\$20.00.

7. Krime ofensa ba integridade fizika simples ho natureza violénsia doméstika

Nú. Prosesu : 0066/20. CVSUI
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Napoleão Soares da Silva
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 17 Maiu 2021, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu PC hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 28 Agostu 2020, maizumenus iha oras tuku 12:30 meidia, arguidu tuku dala ida iha lezada nia kotuk laran no basa dala ida iha lezada nia hasan parte loos, aktu sira ne'e rezulta lezada sofre moras. Antes agresaun ne'e, arguidu ho lezada diskute malu kona-ba bainhira arguidu fila husi to'os atu han maibé modo seidauk tasak, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2(a), 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak desde hola malu iha 2001 to'o agora foin primeiravéz baku lezada no depoisde akontesimentu iha kalan arguidu husuk kedan deskulpa ba lezada. Arguidu mós deklara

katak arrepende ninia hahalok, foin primeiravéz mai hatan iha tribunál no promete sei la komete tan krime hanesan.

Alende ne'e lezada kontinua konfirma faktu sira iha akuzasa un no konfirma mós ho arguidu nia deklarasaun katak depoisde hola malu foin primeiravéz baku dala ida no depois akontese la baku to'o ohin loron.

Alegasaun finaal

Prokuradór, haktuir katak arguidu nia hahalok provadu tuir nia konfisaun arguidu nian no konfirma husi lezada, prokuradór konsidera arguidu nia hahalok ne'e priense elementu sira husi krime ofensa ba integridade fízika simple tuir artigu 145 iha KP, nune'e husu ba tribunál atu kondena arguidu ho pena prizaun fulan tolu suspende ba tinan ida.

Entertantu, defesa iha nia alegasaun haktuir katak arguidu konfesa ba faktus, arrepende ba ninia hahalok, foin primeiravez hatan iha tribunál no desde hola lezada foin primeiravez baku lezada no hafoin akontesementu ne'e arguidu labakutan lezada to'o ohin loron, nune'e defeza husu ba tribunál atu aplika pena ne'ebé adekuadu ba arguidu mak pena admoestasaun.

Desizaun

Depois avalia faktu sira hotu, tribunál prova katak arguidu provadu tuku dala ida lezada nia kotuk laran no basa dala ida iha hasan parte loos. Bazeai ba faktu provadu sira ne'e no tetu mós sirkuntansia sira hanesan arguidu areepende ba ninia hahalok foin primeiravez hatan iha tribunál no agora diak malu ona, maibé tribunál haree katak krime violensia domestika kontinua rezista aas iha tribunál sira tamba ne'e tribunál konklui no deside hodi kondena arguidu ho pena prizaun fulan tolu suspende ba iha tinan ida.

8. Krime tentativa omisídu simples ho arma brankas

Nú. Prosesu	: 0016/20 BBBBL
Kompozisaun Tribunál	: Koletivu
Juis	: Dr. Samuel d. C. Pacheco, Dr. Eusébio X. Victor no Dra. Patricia d. Araujo F. B. M. Xavier
Prokuradór	: Dr. José Elo
Defeza	: Dr. Domingos dos Santos
Desizaun	: Pena prizaun tinan 6

Iha 18 Maiu 2021, Tribunál Distritál Suai prezide rejulgamentu leitura akordaun ba krime tentativa omisídu simples no arma brankas ne'ebé envolve arguidu JCGC hasoru lezadu LBdS, iha Munisípiu Bobonaro.

Akuzasaun prokuradór

Prokuradór akuza katak iha 16 Setembru 2020, iha oras tuku 14:00 meiodia, lezadu Lucio rona asu hatenu nune'e lezadu sai ba haree. Bainhira lezadu sai ba liur arguidu mak iha hela liur no arguidu taa lezadu nia asu, maibé la kona no arguidu dada fali besi ne'ebé tau iha odamatan lutu nian, nune'e lezadu hase arguidu katak "*labele dada sai besi ne'e se lae karau bele tama to'os laran,*" bainhira lezadu kolia tiha nune'e arguidu hakat besik ba lezadu hodi taa lezadu nia kabaas parte loos, taa iha ulun. Arguidu nia asaun ne'e rezulta lezadu monu ba rai, depoisde arguidu monu tiha ba rai arguidu kontinua taa lezadu nia liman no taa lezadu nia isin lolon, bainhira sasin Felisita Pereira haree arguidu taa lezadu sasin hakilar hodi dehan "*tiu tiu too ona avo mate tiha ona*". Testemuña kolia tiha nune'e arguidu nafatin taa lezadu no duni mós sasin maibé la toman.

Prokuradór akuza arguidu kontra artigu 138 KP kona-ba tentativa omisídiu simples ho moldura penal tinan 8 to'o tinan 20 prizaun konjuga ho Lei Nú. 5/2017 kona-ba pratika artemarsiais.

Produsaun ba prova sira

Iha prosesu julgamentu, arguidu deklara katak iha akontesimentu ne'e arguidu atu fila ba nia uma maibé to'o iha lezadu nia uma oin, lezadu nia asu hatenu nune'e arguidu atu taa asu ne'e maibé la kona, arguidu kontinua dada besi ne'ebé tau iha odamatan lutu nian atu baku ba asu refere, maibé seidak konsege baku asu refere lezadu husi kotuk buti arguidu nia kanuruk no dudu tun arguidu nia ulun ba rai no lezadu hadau tiha besi iha arguidu nia liman, tanba ne'e arguidu salva nia aan hodi taa lezadu dala neen. Arguidu hatutan liután katak momentu ne'e se arguidu la taa lezadu, arguidu mak sei mate fali. Arguidu mós deklara katak depoisde taa lezadu, kontinua duni tuir sasin Felisita Pereira maibe la toman.

Alende ne'e lezadu kontinua konfirma faktu sira iha akuzasaun, lezadu mós deklara katak iha akontesimentu ne'e la hakuak arguidu no labuti arguidu nia kanuruk no dudu tun arguidu nia ulun ba rai, lezadu deklara liután katak agora dadaun sei konsumu hela ai-moruk no seidak bele kaer servisu todan. Lezadu mós deklara katak antes ne'e arguidu sira deskonfia lezadu katak lezadu mak halo arguidu nia subriña moras too mate.

Testemuña Felisita Pereira nu'udar lezadu nia bei-oan depoimenta katak, iha akontesimentu ne'e lezadu monu tia mak testemuña husi uma laran halai sai ba haree no hasee arguidu no arguidu kontinua taa lezadu hafoin duni tuir testemuña, maibé la konsege toman testemuña. Alende ne'e testemuña mós deklara katak lezadu agora dadaun sei konsumu hela ai-moruk no kaer servisu todan seidak bele.

Alegasaun finál

Prokuradór haktuir katak mezmú iha julgamentu arguidu koko atu nega faktus balun, maibé lezadu no testemuña konfirma ho akuzasaun prokuradór nian no agora dadaun lezadu mós sei grave no seidak bele halo servisu hanesan baibain, nune'e husu ba tribunál atu kondena arguidu ho pena unika tinan 8 prizaun.

Entretantu, defeza husu ba tribunál atu halo alterasaun jurídiku husi krime tentativa omisídiu simples ba fali ofensa ba integridade fízika grave, tanba defeza haree katak lezadu agora dadaun rekopera ona husi kanek ne'ebé arguidu komete hasoru lezadu, razaun sira ne'e husu ba tribunál atu kondena arguidu tuir konviksaun tribunál ni'an

Desizaun

Depoisde avalia faktu sira hotu, tribunál prova katak arguidu taa lezadu nia kabaas parte loos, taa iha ulun. Arguidu nia asaun ne'e rezulta lezadu monu ba rai, depoisde arguidu monu tiha ba rai arguidu kontinua taa lezadu nia liman no lezadu nia isin lolon, bainhira sasin Felisita Pereira haree arguidu taa lezadu sasin hakilar hodi dehan "*tiu tiu too ona avo mate tiha ona*". Testemuña kolia tiha nune'e arguidu nafatin taa lezadu no duni mós sasin maibé la toman. Bazeia ba faktu provadu sira ne'e hotu tribunál mantein ho akuzasaun prokuradór nian no la aseita ho pedidu defeza nian atu halo altersaun ba krime refere. Ho nune'e tribunál konklui prosesu ne'e no kondena arguidu ho pena prizaun tinan neen.

9. Krime omisídu simples

Nú. Prosesu	: 0005/19. CVZML
Kompozisaun Tribunál	: Koletivu
Juis	: Dr. Samuel da Costa Pacheco, Dr. Eusébio X. Victor no Dra. Patricia de Araújo F. B. M. Xavier
Prokuradór	: Dr. José Elo
Defeza	: Dr. Domingos dos Santos
Desizaun	: Pena prizaun tinan 12

Iha 18 Maiu 2021, Tribunál Distritál Suai prezide julgamentu leitura akordaun ba krime omisídu simples ne'ebé envolve arguidu JP hasoru lezada JC, iha Munisípiu Covalima.

Akuzasaun prokuradór

Prokuradór akuza katak, iha 16 Juñu 2019, iha oras tuku 18:00 lokraik, testemuña Julio barreto uza motorizada tula lezada atu ba iha lezada nia rezidencia Ritoluli Aiasalegu Zumalai, to'o iha area Bulu kraik nu'u laran, arguidu hamrik iha dalan ninin kaer ho ai-dona ida subar iha kotuk laran, bainhira sasin ho lezada to'o iha fatin ne'ebé arguidu

hamrik ba, arguidu foti ai-dona baku sasin maibé tanba sasin hakruk no kona fali lezada nia ulun, ruzulta ran sai husi lezada nia inus no ibun.

Prokuradór akuza arguidu kontra artigu 138 KP kona-ba omisídiu simples ho moldura penál tinan 8 to'o tinan 20 prizaun.

Produsaun ba prova sira

Iha julgamentu, arguidu deklara katak arguidu komete agresau ne'e, tanba antes ne'e testemuña ho arguidu iha organizasaun kunfu, maibé depoisde ne'e testemuña sai husi kunfu tama fali PSHT sein kuñesimentu organizasaun nian, ho nune'e arguidu hein testemuña atu baku, maibé iha momentu arguidu baku testemuña hakruk tiha no arguidu baku kona fali lezada. Arguidu hatutan liután katak antes arguidu baku testemuña arguidu laharee lezada tuur iha kotuk. Depoisde baku kona tiha lezada arguidu tauk no halai ba entrega aan iha Polísia Eskuadra Zumalai. Arguidu mós deklara katak arguidu nia família tuur hamutuk atu rezolve problema ne'e no arguidu ninia família prepara ona osan US\$500.00, fahi ida, fos karun rua inklui kafe no masimidar atu fó ba lezada nia família, maibé lezada nia família la simu. Aguidu mós deklara katak arrepande nia hahalok, foin primeiravéz mai hatan iha tribunál.

Iha julgamentu testemuña JB, depoimenta katak iha akontesimentu ne'e testemuña atu fila ba ninia uma mak hasoru lezada no lezada husu ajuda ba testemuña atu lori lezada ba nia uma, bainhira testemuña ho lezada to'o iha area bulu kraik testemuña haree arguidu hamrik no kaer ho ai-dona ida iha nia liman no hamrik hela iha estrada klaran, nune'e bainhira testemuña ho lezada to'o iha arguidu nia oin, arguidu hamrik netik iha dalan klaran no direktamente baku testemuña, maibé testemuña hakruk tiha no kona fali iha lezada no rezulta lezada monu tun ba rai ulun nakles raan sai barak iha inus no ibun, nune'e testemuña para tiha motor no testemuña duni tuir arguidu maibé arguidu tauk no soe tia ai-dona no halai tiha. Testemuña mós depoimenta katak depoisde akontesimentu ne'e testemuña ba hato'o kedas keixa iha edifisiu PNTL no lori kedas lezada ba iha Sentru Saúde Zumalai no lezada mate iha Sentru Saúde Zumalai.

Alegasaun finál

Prokuradór, haktuir katak arguidu provadu komete krime tuir faktu sira hotu ne'ebé akuza ba arguidu, bazeia ba deklarasaun arguidu nian no konfirma mós husi testemuña iha akuzasaun, ho nune'e husu ba tribunál atu kondena arguidu ho pena prizaun tinan sanolu resin rua no selu mós indemnizasaun sivil US\$500.00.

Entretantu, defeza haktuir katak iha julgamentu arguidu deklara katak tuir loloos arguidu ninia intesnsaun ne'e atu baku testemuña maibé tanba testemuña hakruk no kona fali lezada. Ho nune'e husu ba tribunál atu halo alterasaun kualifikasaun jurídiku husi krime

omisídiu simples ba fali krime omisidui negligente no husu ba tribunál atu kondena arguidu ho pena suspensun.

Desizaun

Depoisde avalia faktu sira hotu, tribunál prova katak faktu hotu ne'ebé produs durante julgamentu provadu hotu, tribunál julga akuzasaun provadu hotu, tribunál nia haree katak arguidu nia intesaun ne'e iha duni ona atu oho ema ruma ne'ebé arguidu prepara antes, ho razaun sira ne'e arguidu nia hahalok ne'e priense duni elementus tuir artigu 138 KP omesidui simples. Tamba ne'e tribunál konklui prosesu ne'e hodi kondena arguidu ho pena prizaun tinan 12.

10. Krime tentativa omisídiu simples no arma brankas

Nú. Prosesu : 0012/20.MFMFI
Juis : Dr. Jose Maria Araujo, Dr. Naason Mário. A. M.
Doutel, no Dr. Benjamin Barros
Prokuradór : Dr. José Elo
Defesa : Dr. Octavio da Conceição
Desizaun : Absolve

Iha 18 Maiu 2021, Tribunál Distritál Suai prezide julgamentu leitura akordaun ba Krime tentativa omisídiu simples no arma brankas ne'ebé envolve arguidu PdC hasoru lezadu DM, iha Munisípiu Manufahi.

Akuzasaun prokuradór

Prokuradór akuza katak iha 14 Agostu 2020, iha oras tuku 14:00 meiodia, arguidu ho lezadu nia kaben diskuti malu kona-ba arguidu taa kotu lezadu nia bibi talin ne'ebé lezadu kesi iha arguidu nia kintal, nune'e lezadu halai sai husi uma laran hakbesik ba arguidu taa kedas dala rua iha lezadu nia liman parte loos no taa dala rua iha lezadu nia ulun parte karuk. Depoisde taa tiha lezadu arguidu soe tiha katana no halai tiha husi fatin akontesimentu ne'e, nune'e Lezadu dehan ba lezadu nia feen atu kontaktu polísia hodi bele atua arguidu. Lezadu ba halo tratamentu iha Ospital Referral Maubisse laron ida depois transfere kedas mai iha Ospital Nasionál Guido Valadares no baixa durante semana ida. Durante halo tratamentu ne'e lezadu gasta osan hamutuk US\$ 500.00.

Prokuradór akuza arguidu kontra artigu 23,138 KP kona-ba tentativa omisídiu simples ho moldura penal tinan 8 to'o tinan 20 no Lei Arma Brankas.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun, arguidu deklara katak antes ne'e fó hatene bebeik ona ba lezadu katak labele kesi nia bibi iha arguidu

ninia kintal no ikus mak arguidu nervoju tesi kotu tia bibi nia talin, no antes arguidu halo agresaun hasoru lezadu, lezadu nia feen sai foti ai-kafe maran ba baku dala rua iha arguidu nia liman loos no lezadu mós foti ai-kafe maran baku dala haat iha arguidu nia isin lolon, tanba sente moras nune'e arguidu halo agreasaun hirak ne'e hasoru lezadu. Depoizde akontesimentu arguidu soe tiha katana no ba entregaan iha polísia. Arguidu hatutan liután katak antes akontesimentu ne'e iha ona problema, tanba lezadu nia oan mane boot ba tesi hotu arguidu nia nuu oan, arguidu deklarara katak tesi nuu oan ne'e sira rezolve ona no konkorda hamutuk atu lezadu sira labele kesi bibi iha arguidu nia kintal.

Alende ne'e lezadu kontinua konfirma faktu sira iha akuzasaun, no deklarara katak iha akontesimentu ne'e arguidu diskuti malu ho lezadu nia ferik oan no baku lezadu nia feen dala rua, nune'e lezadu nia feen hakilar dehan "*sai mai lai se lae Sr. Pedro atu oho ona hau*", nune'e sai mai foti ai-kafe maran hodi baku duni arguidu.

Testemuña APS nu'udar lezadu nia feen depoimenta katak momentu akontesimentu ne'e testemuña ba fó hatene arguidu katak "*nusa mak tesi kotu tia bibi nia talin*," maibé arguidu nonook la kolia buat ida hasoru testemuña, no arguidu foti katana no lori katana nia belar baku dala rua iha testemuña nia liman, ho nune'e testemuña hakilar no bolu lezadu hodi dehan "Sr Pedro atu oho ona hau, testemuña mós depoimenta katak nia kaben sai husi uma laran ba baku duni arguidu mak arguidu taa lezadu. Testemuña mós depoimenta katak labaku arguidu.

Alegasaun finál

Prokuradór, haktuir katak arguidu konfesa faktu sira iha akuzasaun no konfirma husi lezadu rasik no testemuña, mezmú lezadu mak baku uluk arguidu, maibé prokuradór haree katak arguidu laos halo lejítima defeza ba nia aan. Prokuradór haktuir katak kona ba lejítima defeza ne'e bainhira halai no labele ona mak foin defende aan, maibé momentu arguidu baku lezadu nia feen no lezadu nia feen hakilar, nune'e lezadu halai sai ba baku duni arguidu. Nune'e Prokuradór konsidera arguidu provadu komete duni krime ne'ebé prokuradór akuza ba arguidu no husu ba tribunál atu kondena arguidu ba krime tentativa omisídiu simples ho pena prizaun tinan neen no ba krime arma brankas ho pena prizaun tinan tolu. Pena unika prizaun tinan neen no selu indeminizasaun sivíl ne'ebé arguidu gasta ona hodi halo tratamentu ba nia saude.

Entretantu, defeza haktuir katak iha julgamentu arguidu konfesa faktu hotu iha akuzasaun no antes akontesimentu ne'e arguidu fó hatene ba lezadu atu labele kesi bibi iha arguidu nia kintal, maibé lezadu la rona no kesi nafatin, tanba ne'e arguidu nervoju tesi kotu tiha tia bibi nia talin, lezadu nia ferikoan ba hase arguidu katak "*nusa mak tesi kotu tia bibi nia talin*", arguidu seidauk hatan lezadu nia ferikoan foti ai-kafe baku arguidu nia liman no lezadu sai husi uma mai foti ai-naton baku lezadu nia liman,

nune'e arguidu taa dala rua iha lezadu nia liman no dala rua iha parte ulun, depoisde ne'e arguidu soe tiha katana no halai ba edifisiu PNTL. Defeza haree katak arguidu mós ho kondisaun liman karuk la funsiona no arguidu uza katana ne'e hodi defende aan. Ho razaun sira ne'e defeza husu ba tribunál atu halo alterasaun kualifikasaun husi krime tentativa omisídiu ba fali ofensa ba integridade física grave no kondena arguidu ho pena suspensaun tinan ida, tanba arguidu kumpri ona prizaun preventiva fulan sia.

Desizaun

Depois avalia faktu sira hotu, tribunál prova katak krime sira ne'e existe duni hasoru lezadu, maibé bazeia rezultadu deliberaun husi tribunál kolektivu, konsidera arguidu halo lejítima defeza ba nia aan tuir artigu 44 KP no tuir artigu 48 KP, nune'e tribunál esklui arguidu husi krime ne'e. Tribunál mós haree katak fizikamente lezadu forsa liu arguidu. Ho nune'e tribunál konklui prosesu ne'e no absolve arguidu.

11. Krime ofensa ba integridade física símples ho natureza violénsia doméstika

Nú. Prosesu : 0037/17. CVSUI
Kompozisaun Tribunál : Singulár
Juis : Dr. Jose Maria Araújo
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 24 Maiu 2021, Tribunál Distritál Suai prezide julgamentu leitura sentensa ba krime ofensa ba integridade física símples ho natureza violénsia doméstika ne'ebé envolve arguidu GB hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 25 Setembru 2017, iha oras tuku 12:30 meiodia, arguidu tebe dala ida iha lezada nia liman parte loos no tudik monu sai husi lezada nia liman no kona iha lezada nia ain no resulta kanek ki'ik. Antes agresaun ne'e, arguidu no lezada diskute malu kona-ba, bainhira arguidu fila husi serbisu lezada foin mak kua hela aidila atu halo modo meiodia nian, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física símples ho moldura penál to'o tinan 3 ka multa, konjuga ho artigu 2(a), 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu faktu hotu iha akuzasaun no deklara katak depois akontesimentu liu oras balun, arguidu husu kedan deskulpa ba lezada, arguidu hatutan

katak foin primeiravéz mai hatan iha tribunál, arrepende ninia hahalok no promete sei larepete hahalok hanesan iha futuro.

Alende ne'e, lezada mós kontinua konfirma faktu sira hotu iha akuzasaun, no deklarara mós katak arguidu foin primeiravés komete krime hasoru lezada.

Alegasaun finál

Prokurador, haktuir katak arguidu provadu tuir nia konfiksaun no kofirma husi lezada, tanba ne'e prokurador konsidera arguidu ninia hahalok ne'e priense duni element husi artigu 145 KP. Ho Nune'e husu ba tribunál atu kondena arguidu ho pena prizaun fulan haat suspende ba tinan ida.

Entretantu, defeza husu ba tribunál atu kondena arguidu ho pena multa tuir arguidu nia kapasidade ekonomia, arguidu arrepende ninia hahalok no foin primeiravéz mai hatan iha tribunál no diak malu ona to'o ohin lora.

Desizaun

Depoisde avalia faktu hotu, tribunál prova katak arguidu tebe dala ida iha lezada nia liman parte loos no tudik monu sai husi lezada nia liman no kona iha lezada nia ain no rezulta kanek ki'ik.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende ninia hahalok, foin primeiravéz mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

12. Krime tentativa abuzu seksuál ba menór

Nú. Prosesu	: 0002/17.CVZML
Kompozisaun Tribunál	: Koletivu
Juis	: Dr. Jose Maria Araújo, Dr. Naason Mário A. M. Doutel no Dr. Benjamin Barros
Prokurador	: Dr. Rafael Jeronimo Gusmão
Defeza	: Dr. Francisco Caetano Martins
Desizaun	: Pena prizaun tinan 3 suspende ba tinan 5

Iha 25 Maiu 2021, Tribunál Distritál Suai prezide julgamentu leitura akordaun ba krime tentativa abuzu seksuál ba menór, ne'ebé envolve arguidu MX hasoru lezada AF, iha Munisípiu Covalima.

Akuzasaun Prokurador

Prokuradór akuza katak iha 22 Marsu 2017, iha oras tuku 19:00 kalan, lezada ba nonton televizaun iha arguidu nia uma, to'o oras tuku 23:00 lezada toba dukur tiha. Ho nune'e arguidu ho isin molik ba toba besik lezada hodi kolu lezada nia kalsa no roupa laran halo lezada hakfodak no hader no arguidu hatama nia oin-lulik ba iha lezada nia kidun maibe la tama, nune'e arguidu kontinua kose nia oin-lulik ba lezada nia oin-lulik to'o ezakula.

Prokuradór akuza arguidu kontra artigu 23 no artigu 177 KP kona-ba tentativa abuzu seksuál ba menór ho moldura penal tinan 5 to'o tinan 20 prizaun.

Produsaun ba prova sira

Iha julgamentu arguidu nega faktu sira hotu iha akuzasaun no deklarata katak iha akontesimentu ne'e arguidu nia oan ho lezada toba iha televizaun oin, nune'e arguidu kous nia oan ba toba iha kuartu arguidu mós ba toba ona iha nia kuartu. Arguidu deklarata liután katak antes arguidu ba toba arguidu nia feen mak sei nonton hela no iha dadeer arguidu hader mai lezada la iha ona. Arguidu hatutan liután katak depoisde akontesimentu ne'e, iha 27 Marsu 2017, sira rezolve ona problema ne'e tuir tradisaun Timor nian no arguidu fó ona osan US\$1,000.00 no tua sabu jerigen rua ba lezada nia família.

Iha parte seluk lezada kontinua konfirma faktu sira hotu iha akuzasaun, lezada deklarata katak arguidu hanesan lezada nia apa nia primo, lezada konfirma mós ho arguidu nia deklarasaun katak sira rezolve ona tuir tradisaun Timor nian no arguidu fó ona osan US\$1,000.00 no tua sabu jerigen rua ba lezada nia família.

Alegasaun finál

Prokuradór haktuir katak arguidu koko atu nega faktu hotu iha akuzasaun, maibé lezada kontinua konfirma faktu hotu iha akuzasaun, nune'e prokuradór husu ba tribunál atu kondena arguidu ho pena prizaun tinan neen.

Entretantu defeza husu ba tribunál atu fó pena ne'ebé justu ba arguidu ho konsiderasaun sira katak, kazu ne'e sira rezolve ona no arguidu fó ona osan US\$1.000.00 no tua sabu jerigen rua ba lezada nia família.

Desizaun

Depoisde avalia faktu hotu, tribunál prova katak arguidu halo duni tentativa abuzu seksuál ba menór. Bazeia ba faktu provadu sira ne'e tetu mós ho sirkunstásia atenuante sira hanesan, kazu ne'e sira rezolve ona tuir tradisaun Timor nian no arguidu fó ona osan US\$1,000.00 tua sabu jerigen rua no kolabora di'ak ho tribunál. Nune'e tribunál konklui prosesu ne'e no kondena arguidu ho pena prizaun tinan 3 suspende ba tinan 5.

13. Krime kontrabandu

Nú. Prosesu : 0037/19. CVSLL
Kompozisaun Tribunál : Koletivu
Juis : Dr. Naason Mário A. M. Doutel, Dr. Benjamin Barros no Dr. Jose Maria Araújo
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Pena prizaun tinan 2 suspende ba tinan 2

Iha 27 Maiu 2021, Tribunál Distritál Suai prezide julgamentu leitura akordaun ba krime kontra bandu ne'ebé envolve arguidu João Madeira da Silva, Gonçalves Maia no Jeraldo Cardozo kontra Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 13 Dezembru 2019, maizumenus iha oras tuku 6:00 dadeer iha Aldeia Wetaba, Suku Besuk, arguidu Jeraldo Cardozo, hatama gasolina ho minarai liu husi dalan ilegal, husi Indonezia mai iha area Timor-Leste nian, hamutuk jerigen rua kada jerigen ida ho litru 35, arguidu sosa kada jerigen ho folin US\$25.00, total gastus ba sosa gasolina no minarai hamutuk US\$50.00. Alende ne'e arguidu hetan kontaktu husi arguidu João Madeira katak mina iha kalae arguidu Geraldo mós hatan katak mina iha, nune'e arguidu João Madeira kondus nia motorizada revo Fit metan ba iha arguidu Jeraldo Cardozo nia uma hodi sosa gajolina ne'e no kada jerigen ida ho valor osan US\$ 28.00, total osan ba jerigen rua ne'e hamutuk US\$56.00. arguidu sosa gasolina no minarai ho intensaun atu faan tutan iha Suai Vila. Iha loron hanesan arguidu Gonçalves Maia hetan kontaktu husi nia kliente ema Indonezia atu arguidu ba foti minarai jerigen rua iha mota masin, kada jerigen ida 35 litru no kada jerigen arguidu sosa ho folin US\$ 23.00, jerigen rua ne'e ho total osan hamutuk US\$46.00. depoisde sosa tiha gasolina no minarai refere, arguidu sira lori ba Suai Vila, maibé bainhira to'o iha área koitau, Suku Casabauk, membru UPF sira halo pasa revista no halo aprensaun ba objektu refere ho di submete ba iha investigasaun.

Prokuradór akuza arguidu sira kontra artigu 316 KP kona-ba krime kontra bandu ho moldura penal tinan 2 to'o tinan 6 prizaun ka multa.

Produsaun ba prova sira.

Iha julgamentu, arguidu sira konfesa integralmente ba faktu sira iha akuzasaun no deklara katak foin primeravéz mai hatan iha tribunál, depoisde akontesimentu ne'e sira larepete ona sira nia hahalok ne'e, arguidu sira deklara katak nesesidade mak obriga sira viola lei, arguidu sira hanesan agrikultor ne'ebé la iha rendimentu fiksi no arrepende ona sira ninia hahalok.

Alegasaun finál

Prokuradór, haktuir katak iha julgamentu arguidu sira konfesa faktu hotu iha akuzasaun, bazeia ba sira nia konfiksaun ne'e prokuradór fiar katak arguidu sira nia hahalok ne'e priense elementu sira iha artigu 316 KP, bazeia ba konsiderasaun ne'e husu ba tribunál atu kondena arguidu ho pena prizaun tinan 2 suspende ba iha tinan 2, objektu aprendidu ne'e afavor ba estadu.

Enkuantu defesa haktuir katak, arguidu sira provadu faktu sira iha akuzasaun no hatudu sira nia arrependementu perante iha julgamentu, arguidu sira agrikultor hotu no la iha rendimentu, tamba ne'e husu ba tribunál kondena arguidu sira pena mais adekuadu.

Desizaun

Depois avalia faktu hotu, tribunál prova katak arguidu sira komete duni krime kontra bandu. Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu sira konfesa arrepende sira nia hahalok, nune'e tribunál konklui prosesu ne'e no kondena arguidu sira ho pena prizaun tinan rua suspende ba tinan rua, objektu aprendidu tribunál deside afavor ba estadu.

14. Kontrabandu no reseptasaun simples

Nú. Prosesu	: 0005/19. CVSLL
Kompozisaun Tribunál	: Koletivu
Juis	: Dr. Naason Mário Armindo Marques Doutel, Dr. Benjamin Barros no Dr. Jose Maria Araujo
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena prizaun tinan 2 suspende ba tinan 2

Iha 27 Maiu 2021 Tirbunál Distritál Suai prezide julgamentu leitura akordaun ba krime reseptasaun simples no kontrabandu ne'ebé envolve arguidu MdA no JB hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 22 Janeiro 2019, iha oras tuku 7:00, arguidu JB ba hasoru malu ho ema Indonezia naran Melki iha mota masin, hodi sosa gazolina hamutuk jerigen lima kada jerigen 35 litru, arguidu sosa mina ne'e kada jerigen ida ho folin US\$ 22.00 total osan ba sosa gazolina ne'e hamutuk US\$147.00. Sosa tiha mina rai no gazolina ne'e subar arguidu subar tiha iha duut laran, hafoin iha oras tuku 20:00 kalan, arguidu foin fila ba lalin ba rai iha ninia uma iha Wetaba.

Tuir mai iha 01 Feveireiru 2019, iha oras tuku 19:00 kalan, arguidu MdA ba iha arguidu JB nia uma, hodi sosa tutan minerai ho gasolina ne'e ho total osan hamutuk US\$168.00. Kada jeringen ida arguidu MdA sosa ho valor osan US\$28.00. Tuir mai arguidu MdA tula gasolina ho motorizada tiga roda, arguidu nia intensaun lori ba Suai Vila, maibe bainhira to'o iha area Koitau Polisia UPF halo aprensaun ba objektu sira ne'e no submete ba iha investigasaun.

Prokurador akuza arguidu JB kontra artigu 316 KP kona-ba krime kontrabandu ho akuza arguidu MdA kontra artigu 271 KP kona-ba reseptasaun simples ho moldura penal tinan 2 ka multa.

Produsaun ba prova sira

Iha julgamentu, arguidu JB deklarata katak sosa mina rai no gasolina hirak ne'e husi ema sidadaun Indonezia ho naran Melki, arguidu deklarata katak gasolina ho minarai ne'e kada jerigen ho folin US\$22.00.

Arguidu hatutan katak jerigen lima ne'e sosa ho folin US\$147.00, depois faan fali ba arguidu MdA kada jerigen ida ho folin US\$ 28.00 total osan hamutuk US\$168.00.

Arguidu deklarata katak hatama mina bebeik liuhusi dalan illegal kada fulan ida hatama dala haat, arguidu hatutan katak depois akontesimentu ne'e arguidu lahatama ona mina. Arguidu deklarata tan katak foin primeiraves hatan iha tribunál arrepende nia hahalok katak hahalok ne'e ladiak, arguidu moris hanesan agrikultor no la iha rendimentu.

Arguidu MdA, konfesa faktu sira iha akuzasaun no deklarata katak foin primeiraves sosa gasolina ho minerai iha arguidu JB, arguidu hatutan katak kona ba faan ba ema seluk ne'e arguidu lahatene. Arguidu arrepende ninia hahalok foin primeiraves mai hatan iha tribunál.

Alegasaun final

Prokurador, konsidera arguidu sira provadu komete krime bazeia ba akuzasaun prokurador nian, bazeia ba konfisaun arguidu sira nian, tanba ne'e husu ba tribunál atu kondena arguidu ho pena prizaun tinan rua suspende ba tinan rua, no objektu aprendidu ne'e a favor ba estado.

Entretantu, defeza haktuir katak, arguidu sira konfesa faktu sira hotu iha akuzasaun, arguidu sira mos foin primeiraves mai hatan iha tribunál, arguidu sira promete sei la repete hahalok ne'e iha futuro, ho nune'e defeza husu ba tribunál kondena arguidu ho pena multa.

Desizaun

Depoisde avalia faktu hotu, tribunál prova katak arguidu sira provadu komete krime tuir akuzasaun prokuradór nian.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira la iha antisidentes kriminais, arrepende sira nia hahalok foin primeiravés mai hatan iha tribunál. Ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua no objektu aprendidu afaavor ba estadu.

Atu hetan informasaun liutan faavor kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>